



# Nafarinke Waa

Leveled



Kuni irkisaanchu maxaafi ‘USAID’inni afi’nonni woxu irkonni  
‘Save the Children’i, Rosu Ministerenna Wodiidi Daga  
Dagoominna Manni Qoqqowu Mangiste Rosu Biiro mittimmate  
sumiimmenni qixxaawe attamamino.

2009 M.D



**USAID**  
FROM THE AMERICAN PEOPLE



**Save the Children**



The CC By license lets others distribute, adjust, and build upon this work, for free or commercially, as long as credit is given to the original creation. However, any changes from the original must be indicated.

For more info please refer: <https://creativecommons.org/licenses/>



# Nafarinke Waa

Kifile 4

Lamala 21



## Qaagiishsha

Aante shiqqino niwaawe (dhagge) illachishshannohu nabbawate huwato aanaati. Niwaawete albaanninna gedensaanni noo xa'mo dewartannota xawisatenni niwaawete mereero shiimare taxxi yitanni nabbabbinore xaphi assidhanno gede kaayyo uyiyyensa. Rosaano niwaawe nabbawate albaanni konni albaanni affinore kultanno gede xa'matenni jawaachishshensa. Konni garinni rosaanonnita niwaawe nabbawate hasatto kakkayissinihu gedensaanni niwaawe nabbawa hananfona. Rosaano irkissinanni baali, xa'muwa dawarate rosaano baala beeqqo assitanno gede jawaachishshensa. Uytanno dawarono haadhinanni taashshi'ri-tumo uyiyyensa.

### Nabbawate Albiidi Xa'mo

1. Kofote waa affine egentinoonni? Hiittooho?
2. Balete way hiittooho?
3. Anni'nenna ana'ne bashsho hiittoo waa agganni sa'inoro odeessite egentino'ne?
4. Ki'ne xa hiitoo waa agginanni heedhinoonni?



## Gafa Mite

### Kofote Waa Horonsi'neemmo Waro

Bashaashe Basheetoti olliinkera heedhanno  
manchooti. Ariise Roqonsi Rooratoho. Lamé  
qaaquullese hawarro gamba assite ofoshshiishshino.  
Bayriidi qaaqqose, Maatafe lee kifile rosaanchooti.  
Maa'niidihu, Rooddamo kayinni shoole kifile rosanni  
no. Kuri lamente oososera odeessa hasidhinori

hee'reennaati gamba assitinohu. Anninsa Roqonsino ledonsa ofolle no.

Bashaashe qaaqqose Rooddamo woshshite, “Way qaarri assanni sainonke gara techo la’inanniri ledo xaadisanni kuleemma’nena macciishshe ooso’ya.” yitu. Lamunku qaaquullise dawaro qoltukkinni sammi yite ise la’anni no. Rooddamono rodoosino qoltukkinni amanti qolte, “Konne asseemmahu, alba ikkinanni sa’noonnita habbinannikki gedeeti.” yitu. Rooddamo rahe haa’re, “Bashe’ya maahoyye kulattankere macciishshineemmo.” yii.

Bashaashe hasaawase togo yitanni hanaffu. “Alba saynsooni heeshsho xaate ledo xaadisanni odeesseemma’nena seekkitine ha’runse”e.” yitu. Borrichu woradi giddo way asse shetisanni sainonsa gara illachishshe,” Hee’noommohu kofote waa horonsi’anni qarqariraati. Kuni Borrichu woradi rooriidi qarqarisi way addintanni qarrisanni keeshshino qarqaraati. Techo qawaaxxi’noommohura ki’nera leella hooga’nera dandaanno. Maganu galata

xa hanboommoha ikkirono, ninke qaerano kuni way qarri seeda yanna qarra ikkinonkeho.” yite sasunku alba seekkite la’u.

Maatafe qolte, “Bashe, ane habbanno yiteetini, ani afoommawe. Kofote waa agginanni sa’inoonnita kuloottaewe. Lekkakki hiiqqi’roottahu nafu kofote giddo ubbe ikkinota dikulittanke!” yite amase alba la’uta hindiiddo daggeennase ille riqqite sammi yitu. Bashaashe qoltannotino, “Ee, garaho. Xaano lede halashshe kulamma’neraatillana atera kuloommaheta afoomma. Qaenkera way ikke keeshshino garanna xa noo deerra xaadise dhagge habbinannikki gede assamma’neraati. Didanchaho?” yite hasattonsa affara xa’mitu.

Rooddamo qolannoti, “Bashe’ya lowo geeshsha danchahona kulinkella. Ki’ne ikkitinanni sa’inoonni gara ninkeno afa hasiissannonke.” yii. Anninsa Roqonsi areesi abbitino hasaawa lowo geeshsha baxino. Roqonsi, Bashaashe affino uytasi geeshsha nafa diagdhino. Isino sumuu yaasi xawisanni, “Hay

mayyaatta Bashaashe kaimunni kayisse hasaawinsa;  
anino huluullannowi hee'riro taashsheemmohena.”  
yee jawaachishise.

Lamuku qaaquulli lekka fitidhe angansa xaaxidhe  
hasaawa macciishshate quqquxante ofoltino.  
Roqonsino lame hige cirate alba Bashaashe  
hasaawi widira highi. Isinni Bashaashe woshshe,  
“xaate hasaawakki hanafissiyya!” yii. Bashaasheno  
hasaawase aane noo garinni odeessitu. “Qaenkera  
waa afi'rate injo duucha la'nanni sa'noommo.. Hanni  
balaxe kofote wayre odeesseemma'ne.”

Bashaashe hanaffino hasaawa konni garinni suffu.  
Kofote way gara kulte ka”a hasidhino. “Kofote  
waa afinokkihu woluno hee'rara dandaannohura  
kofote way hiittoohoro ki'ne affiniro afinokkihurano  
kultinanni. Ninke nafara noo kofore kulumma'nero  
wole koforeno affinara dandiitinanni,” yitu.  
Maatafe ka'annoti, “Bashe xa kofote mayimmare  
kuluttankeraati?” yite xa'mitu. Bashaasheno,  
“Beetto'ya Macciishshe”e. Nafaranke hala'ladu xawi



no. Kunni hala'ladu xawira hala'lado kofo no. Tini kofono qachinke manni baalu horonsi'rannote" yite foole qo'litu.

Bashaashe hasaawase suffannilla no. "Anni'ne qachu manni ledi ikke mitto arro hala'lado kofo umino. Ummoonni kofote bale lowo geeshsha hala'lado ikkitinohura seeda barra adhitinonsa. Anni'nenna qachinke manni konne assitinohu hawado xeenaa ganiro hakku xeenunni dirrino way hattenne hala'lado kofo giddu lolahe woy daade wo'manno gedeeti. Heddino gede hakko hawadonni kofo wo'mite agurtu. Wole diro hakkeeshshi kofo mitte higge wo'mite diegentino. Hakko hawado kayinni gane egenninokkiha hoola yinoonni xeenaa ganino daafira kofo mittu hawadinni wo'mite horonsi'rate injaado ikkitino," yite qaaquullenna anna qasse la'u.

Bashaashe qaaquullu wodana wolewa higgannokki gede isewa qoltanni, "Ooso'ya macciishshe"ella, woretena," yite kofonsa horo tittirtu. Wolu way nookkihura ka'nirira calla horonsi'nannita kuttanni,

“Way hasiisanno baalira horonsi’neemmoti tenne kofooti. Agateno tenne kulumma’ne kofo horonsi’neemmo. Qishi’ratenna gafi’rateno ise horonsi’neemmo. Hayishshi’rateno horonsi’neemmoti iseeti. Ninkeno qachu manni baaluno saadate hayikkisi’neemmohu tenne kofo waati. Roqonsa digaraho?” yitu.

Roqonsino afiisenni rahe haa’re lamenska qaaquulle su’minsanni woshshe, “Maatafe! Rooddamo! Ama’ne yitannori garaho. Hatte ama’ne yitanno yannara lowonta mitii’minanni sa’noommo. Qarru qarra sainoho; dhibbu dhibba sainoho. Konne kofote waa aganni lowo manni dhiwammanna assinanniri ba”anna sa’noonni. Aju akkali dhiwammanna shetto la’noonni dirooti. Qaaquulluno lowohu gawajjamino. Anino mitte hige jaddo dhiwame Irgaalamete Hosofitaale massineenna goxe akka’me reye hooge gatoommo. Anetalla yoommo’nena woluno kawiinni ka’ne hosofitaale dunkoonni manni kiiri diafi’rino.


Massidhinanni ooso'ya xa hattenne hamboonnina!” yii afoo amaxxe maala'lanni.

Rooddamo wona amasi yituta wodanaho wodhe no. Annisi hige hige sayissino heeshshore kulinsate wona amasire kaynsita buuxi'rara hasi'ri. Hattenne bade afate yee, “Anna, Bashe'ya lekka hiiqqidhinohu hattenne kofo giddo ubbeeti?” yee xa'mi. Roqonsino, “Eewana beetto'ya! Amakki kofote gamira quphi yite waa hinkii'litanno. Hinkii'litanni heedheenna mitte amaliilla buuddaame saa noonketi badheenni higge waa aggara martanno. Amakki tenne saa dila'ino. Ko mereero dagge qasse gamunni way giddo tugginose. Lekka sarraaqidhe ubbe kofote giddo heedhe raarteenna mannu mare fashshinose. Hakkiicho erante hiiqqantinose lekkaati togo ikkite gattinoseti.” yii bordunni hadhanno lekkase leellishanni.

Maatafenna Rooddamo amansa lekkare hede boodere dadillara ikki. Roqonsino, “Ma”assinanni ooso'ya hakku sainoreetina!” yee umo heeshshi yii. Bashaashe Maatafe woshshite, “Sainorira dihuluullammani.

Rooddamo ile lossommahu togo ikke hee'reetiwe xeino'neri nooni? Gibbiniro kullaanni'neri ba"anno'ne." yitu. Roqonsino, "Ooso'ya kofo hakko garinni horonsi'nanni sa'noonnitena tenne wolere odeessito'nena agurre. Hanni Bashaashe wolere abbi," yii.

Bashaasheno Maatafenna Roodamo bado badotenni umo amammadde, "Kawa higge," yite albansa ise widira qoltu. Qolteno, "Xa kofote waa horonsi'ratenni wole waa horonsi'rate widira sa'noommo yanna kuleemma'nena agarre," yitu. Rooddamo qole, "Bashe mayinnireeti?" yii. Iseno, "Balete waa horonsi'nanni sa'noommo yannareetina macciishshe"ella!" yitu.



## Gafa Lame

### Balete Waa Horonsi'neemmo Waro

Bashaashe balete waa horonsidhanni sa'ino gara kultansara alba wodhitu. Rooddamo woshshite, “Roodde, balete wayre kulamma'neraatina qixxaabbinoonni?” yite xa'mitu. Rooddamo qole Maatafe woshshe, “Maatu, kawa higge macciishshi.” yee wodana wolewa qoltinota hasaawinsa widira qoli. Isinni qole, “wolere kultannonketa giwootta macciishshi,” yii. Aaneno alba amasi

widira qole, “Bashe, macciishshinoommona hanni hasaawattankere hasaawinkella,” yii.

Bashaasheno odoose widira higge Roqonsa, “Maahoyye so’rummawa taashshattoena.” yite odeessa aane noo garinni hanaffu. “Kofote waa agurrummo gedensaanni horonsi’noommohu balete waati. Balete wayranna kofote wayra badooshshu noonsa. Balete way kofonnihunni boodere woyyimma afi’rinoho. Ikkeenano, daafursanno gari majjaha di”ikkino. Fayyimmateno addintanni qorophotenni horonsi’ra hasiissannoho. Qorophotenni horonsi’ra hoongiro isino mitiimma afi’rinoho,” yitu.”

Bashaashe hasaawase diuurrissino. Sasunku ha’runsitanni nooseta buuxxe kunni garinni ledde suffu. “Balete way baattote giddora qolle bale umme fushshi’nanniho. Ninkerano anni’ne bale untanno ogeeyye abbeenna nafara untinonke. Tenne bale dininke calla horonsi’neemmona wolu mannino daye hinkii’lanno.” Roqonsino oosono odoose ha’runsitanni no.

Bashaashe hasaawase suffannilla no. Balete wayra assitanni sa'ino qorophoreenna woyyanbesire hasaabbabnni, “Yuumma'nente gede balete way co'imate widoonni kofonnihunni boodere woyyinonke. Fushshi'nummohano ganfe angeemmo gede rosiinseennanke dhibbunni amadama woyyaanboommo yannaati. Hawado bale wo'mite heedhannohura qarru dinona arri yannara kayinni xoe ba'anni wotto worannonke. Hakka woyite bale lende lende worora qolle ummanni badandanni. Hattenne yannara bale xeertidhanni hadhannohura goshooshe fushshate lowonta daafursanni ha'rannoha ikkanno,” yite hasaawa taxxi assitu.

Hasaawaho bado Roqonsi adhe, “Balete wayra ishinu eannokki gedenna mitiri giddo uwe reyannokki gede seekke tua hasiissanno. Ishinu woy lubbo noori balete giddo uwiro way burquuqamannohura didanchaho.

Konnirano qorqorrotenninna haquunni tuana loonse tui'neemmo," yii. Qoleno konni garinni wole odoo hanafara, "Togoonni qarrammanni hee'neenna wole kaayyo daggunke," yii. Maatafe xa'mitanni, "Hiittoo kaayyo daggu'ne?" yitu.

Roqonsi qubbichisinni gobbara qole leellishanni, "Ko'onne paampete waa diaffini?" yii. Rooddamo rahe haa're, "Anfoommowe anna. Isino dibalenniholla?" yiita Maatafe qocce haadhe, "Balete wayinna paampennihu mittohoni? Diadda addaati!" yitu.

Roqonsi konni garinni xawisinsa. "Eewanni paampete way balenniho. Ikkeennano, lowo badooshshi noonsa. Balete waa angatenni mannu wolqanni u'minoommo. Paampete wayra kayinni bale untinoti maashinete. Way balete giddonni alira hige daannohu paampete siwiila hurgunfannaati. Konni daafira balete way gede waa fushshate lowota didaafurranni. Bale beeshshini woyteno way giddo xagicho worre beeshshinannihura fayyimmate lowo bidho diafi'rinoho."



Maatafe qoltannoti, “Konne paampete waa afi’rate kaayyo uyi’nehu ayeti?’ yite xa’mitu. Roqonsi qola geeshsha Bashaashe haadhe, “Mangittetewe,” yitu. Isenni qolte, “Konne waa lowo manni horonsi’neemmo. Hawadono arrono baikkinni keeshshanna horonsi’nanni sa’noommona xa kayinni agurroommo,” yite wolere odeessitanno gedeeta labbanno.

Maataferanna Rooddamora hasaawo lowo geeshsha baxisinonosa. Aananno hasaawirano quqquxantinoha labbanno. Rooddamo amasi woshshe, “Bashe! aanchite mayinnire odeessattankeraati? Hanni rahissinke.” yii. Maatafe qolte haadhe, “Eena rahinke hanni, daafursarano yoranni noonkena!” yitu. Bashaasheno, “Maahoyyena kawa higgexa odeessumma’nena.” yitu.



## Gafa Sase

### Baambu Waa Horonsi'neemmo Waro

Rooddamo Bashaashe qase la”anni, “Nafarinkehu paampete way xa mayra baiyya?” yii. Bashaasheno, “Beetto’ya, olliinke manni daratu konne waati horonsi’rannohu. Mannu batinyinni qorowo assa hoogatenni ikkinote. Hurgufaancho paampera mannu anga batidheennase ‘balaashsha’e’ ba’uwe.” yitu. Bashaasheoo paampete waa agure baambu waa horonsi’ra hanafino.

Maatafe qolte, “Ama baambu waa loonsinkehu dihaakkunni gedensaanniiti?” yitu. Bashaasheno, “Eewana beetto’ya!” Baambu way daynke kawa daafurono gantoommo. Way widoonni daanno dhibbino dino yaa dandiinanni,” yitu. Hakiinnino baambu way wolewa xagichu baambu giddoonni hige daanno daafira wole co’immate qarra afi’rinokkitanna hinkii’lateno daafursannokkiha ikkinota odeessitunsa.

Bashaashe kultinonsari aana guwuurse Roqonsi ledanni, “Bashsho gede olluu manni udume mittowa daye dikunseenanno. Xa baalu mannira qacha qachaho noosi daafira xeerto gambayibbanna jaarikaanna bayi’ne ha’ra gattino.” yii. Isinni qole buuxanni, “Bashaashe digaraho?” yee xa’mote gede assita Bashaasheno, “Eewana Roqe!” yite dawartu. Baalunku hagiidhite ba’inori mimmitunniwa higge albansa la’u.

Xa horonsidhanni noo baambu way kaima affara hasidhino. Rooddamo annisi widira hige, “Isi kuni baambu way maminni daynoho?” yii. Roqonsino konni garinni xawisisi. “Kuni baambu way Bossitote ka’aanni Caanco yianniwiinni dayinoho. Bossito diaffini?” yii. Rooddamono, “Anfoommo. Tenneeto Irga ha’nanni la’noommowe.” yee dawari. Roqonsino, “Hakkonne Caancote waa hala’ladunni konfe, xagicho worre, beeshshine agurroonni. Qoleno way mitiimma noonsa gammoojjete qarqara qolle baambunni bobbaansoonniho. Hakkiichinni kaeeti ninkerano iillinohu. Dihattooti ?” yii Bashaashe widira qole la”anni.

Iseno, “Garaho! Hattenne way assanni sainke beebba mito lekka hiiqqita, me”e saada reyituta, meu hallo taita baala hanbe techo baambu waa horonsi’neemmore ikkinoommo.” yite anga farri yite Kaaliiqase gaiaxxitu. Baalunku hagiidhami.

Jeefoteno Roqonsi, “Ooso’ya tenne  
hasaanboonni’nehu sainore affinaraati. Techo  
hee’neemmo heeshsho lowo qarra sa’ne  
dangoommota ikkitinota affine roso adhitinaraati.”  
Yee seejjote gede assi. Amansano qarru yanna  
sa’annota woyyaabbino yanna dagguro sa’noonni  
gara hawa hasiissannokkita kultunsa. Qolteno, xa  
afidhinoha baambu waa garunni amaddanno gede  
seejjitunsa.

## Nabbawate Gedensiidi Xa'mo

Biddissa : Aante shiqqino xa'mo niwaawete garinni dawari.

1. Kofote waa yinannihu hiittoo waati?
2. Bashashe lekka hiiqqidhinohu ma"assitanniiti?
3. Bashaashe maate xa horonsidhanni noo way mayinniho?
4. Baambu way wolu wayinni baxxanno gara xawisi.
5. Balete way qorophotenni horonsi'ra hoogiro qarra abbannohu mayiraati?
6. Anganni way hiittoooha ikka hasiissannosi?

